



Veliko priznanje zaposlenicima i potrošačima

Ante Vlahović Najmenadžer, a Adris grupa Najkompanija 2011.

Na tradicionalnoj manifestaciji izbora najmenadžera godine srednje i jugoistočne Evrope, održanoj u Sarajevu, međunarodni žiri sastavljen od najuglednijih menadžera, ekonomskih stručnjaka i naučnika, proglasio je Antu Vlahovića *Najmenadžerom*, a Adris grupu *Najkompanijom* 2011.

Nagrada se dodjeljuje za konkretne rezultate, koje je menadžer postigao u praksi i konkretne korporativne rezultate, koje su ostvarili na domaćem i regionalnom tržištu. U obrazloženju stoji kako se ova nagrada dodjeljuje menadžerima i kompanijama, koji svoju državu i regiju vuku naprijed u razvoju.

Na svečanoj ceremoniji, preuzimajući nagradu, Vlahović je, uz ostalo, rekao: "Ovu vrijednu nagradu shvaćam kao priznanje svim zaposlenicima Adrise i milijunima naših potrošača u srednjoj i jugoistočnoj Europi. U bitno promijenjenim okolnostima, kada je posve izvjesno da Hrvatska postaje 28. članicom EU, držim osobito važnim naglasiti potrebu da naše države ulože dodatne napore u traženju dobrih i racionalnih gospodarskih odnosa i urede ih u interesu građana naših država i naših kompanija. Da bismo održali naša gospodarstva i očuvali radna mjesta, morat ćemo podići razinu i znanja i konkurentnosti i samopouzdanja. U protivnom, ostat ćemo tek notorne adrese globalnih preuzimača". **B**

PU FBiH naplatila 1.744.817.257 KM poreznih prihoda

Porezna uprava Federacije BiH u periodu januar- juni 2011. godine naplatila je ukupno 1.744.817.257 KM poreznih prihoda, što je za 62,36 miliona ili 3,7 posto više u odnosu na isti period prošle godine. U strukturi naplaćenih poreznih prihoda najviše je naplaćeno po osnovu doprinosa za penzijsko invalidsko osiguranje, zdravstveno osiguranje i osiguranje za slučaj nezaposlenosti, ukupno

1.318.926.079 KM, što je za 96.212.801 milion ili sedam posto više u odnosu na isti period prošle godine.

Doprinosi za penzijsko invalidsko osiguranje naplaćeni su u iznosu od 727.971.050 KM, što je za 49,8 miliona, ili sedam posto više u odnosu na isti period prošle godine, doprinosi za zdravstveno osiguranje naplaćeni su u iznosu od 530.952.674 KM, a doprinosi za osiguranje od nezaposlenosti u iznosu od 60.002.355 KM.

U strukturi naplaćenih prihoda po osnovu poreza na dohodak naplaćeno je 133.399.253 KM, što je za 16,77 miliona ili 14,3 posto više u odnosu na isti period prošle godine. Po osnovu ove vrste poreza, 85 posto prihoda odnosi se na porez na dohodak fizičkih lica od nesamostalne djelatnosti.

Povećana je i naplata poreza građana i to poreza na imovinu kojeg je naplaćeno 42.435.300 KM ili 5,2 miliona ili 14 posto više u odnosu na isti period prošle godine. **B**



U odnosu na isti period prošle godine više za 3,7 posto

Inicirano formiranje IBN BiH

USAID-Sida FIRMA projekat je sa novom serijom radionica u Mostaru, Prijedoru i Tuzli otpočeo drugu fazu realizacije programa kojim se želi pomoći uspostavljanje *Mreže poslovnih inovacija (IBN)* za mala i srednja preduzeća (MSP) u Bosni i Hercegovini.

U okviru svojih napora da se u cjelini poboljša razvoj inovacija kod drvoprerađivačkih i metaloprerađivačkih preduzeća u BiH, USAID-Sida FIRMA projekat inicirao je formiranje *IBN BiH*. Mreža u BiH zasnovana je na *Evropskoj mreži poslovnih i inovacijskih centara (EBN)* koja ima više od 200 članova iz svih dijelova Evrope i šire.

Svrha ove mreže je da se ohrabri saradnja svih organizacija koje provode aktivnosti kojima se podržavaju inovacije.

Međutim, da bi neko postao član, a članovi se nazivaju *Centrima poslovnih inovacija* ili *BIC*, organizacije moraju ispuniti određene kriterije kako bi pokazale da su stabilne u pogledu finansijskih sredstava i osoblja, te da nude (ili namjeravaju nuditi) neku vrstu inovacionih usluga za *MSP*. Pomenuti kriteriji predstavljani su na radionici koja je 12. jula održana u Mostaru, a naredne će biti održane u Prijedoru i Tuzli, pri čemu će lokalne organizacije moći da izvrše samoocjenjivanje i tako utvrde da li mogu postati *BIC* i pridružiti se inovacionoj mreži BiH. Sve organizacije iz hercegovačke regije bile su pozvane da učestvuju, uključujući lokalne razvojne agencije, poslovna udruženja i druge organizacije koje podržavaju *MSP*.

Bosna i Hercegovina mora razviti svoje inovacione kapacitete kako bi razvila proizvodni sektor koji će moći da odgovori na konkurentne pritiske tržišta Evropske unije. To je ključna komponenta kopenhagenskih ekonomskih kriterija za pristupanje EU i krovni cilj *USAID-Sida FIRMA* projekta. **B**